



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.244/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kymete Kicaj kryesuese, Arsim Hamzaj dhe Skender Çoçaj anëtarë, duke vendosur përkitazi me ankesat e subjektit politik Partia Demokratike e Kosovës (PDK) me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 01.02.2025, merr këtë:

V E N D I M

- I. PRANOHEN të bazuara ankesat e subjektit politik Partia Demokratike e Kosovës (PDK), me seli në Prishtinë, Anr.244/2025, Anr.245/2025, Anr.246/2025, Anr.248, Anr.249, Anr.250, Anr.257/2025, Anr.258/2025, të datës 29.01.2025 dhe Anr.267/2025, Anr. 268/2025, të datës 30.01.2025.
- II. Subjektit Politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 35,000.00 (tridhjetepesëmijë) euro.
- III. Detyrohet Subjektit Lëvizja Vetëvendosje (LVV), që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 29.01.2025 PZAP-i, ka pranuar ankesat e identifikuar me numër Anr.243/2025, Anr.244/2025, Anr.245/2025, Anr.246/2025, Anr.248, Anr.249, Anr.250/2025, Anr.257/2025, Anr.258/2025, dhe me datë 30.01.2025 Anr.267/2025, Anr.268/2025 nga subjekti politik Partia Demokratike e Kosovës (PDK), me seli në Prishtinë, kundër subjektit politik Lëvizja Vetëvendosje (LVV).

-Në ankesën Anr.244/2025, me datë 27 janar 2025 kandidati për deputet nga radhët e subjektit politik Lëvizja Vetëvendosje aktualisht edhe kryetar i këtij subjekti politik si dhe Kryeministër i Republikës së Kosovës në tubimin e mbajtur në Komunën e Drenasit ka deklaruar *...jemi duke i hequr qafe, duke i pensionuar, dukë i eliminuar nga skena e pushtetit*

politikanët, himni i të cilëve nuk është rreth flamurit të përbashkuar, por rreth korrupsionit të përbashkuar, të dashur qytetare të Drenasit ata i ka bashkuar korrupsioni. Ata po i ndanë e po i përçan paraja e plackitur dhe zhvatur nga korrupsioni i tyre i përbashkët. Pra edhe një herë korrupsionin e kishin të përbashkët, por paraja po i ndanë e po i përçanë prandaj ata që ishin të pabesë janë bërë edhe të pashpresë”. Parashtruesi i ankesës si provë ka bashkangjitur CD, me përmbajtje të videoincizimit të fjalimit, si dhe ftesë publike të publikuar nga Lëvizja Vetëvendosje.

-Në ankesën Anr.245/2025 pretendohet se me datë 28 Janar 2025 kandidatja për deputete nga radhët e Lëvizjes Vetëvendosje, aktualisht Ministre në Ministrinë e Drejtësisë znj.Albulena Haxhiu, ka postuar në profilin e saj në rrjetin social në facebook, deklarim me përmbajtje se gjuhës nxitëse dhe urrejtse ndaj antarëve të PDK-së duke deklaruar ...Sami Lushtaku mbremë personalisht ka tentuar ta sulmojë eskortën e Kryeministrit. Ai me veturë zyrtare, 02Z të Komunës së Skenderajt e ka pre rrugën e Kryeministrit më qëllim sulmi. Dëgjova që disa gazetarë të Klan Kosovës, e kanë pyetur kryeministrin se po i përdor veturat zyrtare, ndoshta është më mirë me e pyet Saminë se prej së cilës pompë të benzinës i ke komandu Huliganët e tu para se të nisesh si i frustuar. Parashtruesi i ankesës si provë ka bashkangjitur: Postimi i shpërndarë në profilin e rrjetit social Facebook, me përmbajtje të gjuhës nxitëse, përqarëse dhe denigruese ndaj anëtarëve të Partisë Demokratike të Kosovës <https://www.facebook.com/albulenaa.haxhiuu/posts/pfbid02AĒ93JuooPmYbYqPokGHNaU7395MmGFj96QP7iF13gp981MptVtBXeb4vh3B3BUYd!>; Screenshoot i postimit nga znj. Albulena Haxhiu në të cilën argumentohet koha dhe data e shpërndarjes së postimit me përmbajtje të gjuhës nxitëse dhe përqarëse.

Në ankesë Anr.246/2025 pretendohet se me 28 janar 2025, kandidati për deputetë nga radhët e LVV z. Dimal Basha ka publikuar në status në rrjetin e tij social në facebook në të cilin shkruan: *Vota për PDK është vetëm fuqizim për Sami Lushtakun e që Kosovës nuk i duhen më politikanë që sillen si bandita. Kosova nuk i duron më Banditat.* Parashtruesi i ankesës si provë ka bashkangjitur statusi i publikuar në profilin e z. Dimal Basha në rrjetin social Facebook; <https://www.facebook.com/dimalbasha/posts/pfbidOXu61b3m3tĒKhmRzNsĕtjps8KGNQsFIĒgDPKG4mJAmAXaRTYCnpuVucJ0Ē9BdPIcD71>, dhe screenshot nga statusi i publikuar në profilin e rrjetit social Facebook i z.Dimal Basha.

-Në ankesën 248/2025, pretendohet se me 27 janar 2025 në tubimin e mbajtur në Komunën e Skenderajt janë publikuar disa fotografi, në rrjetet sociale dhe mediat elektronike të mbështetësve të LVV, të mbledhur në këtë tubim, duke ngritur tre gishta lartë, gjest i cili është simbol ekskluziv serb, i cili në tre vitet e fundit ka marr ngjyrimet nacionaliste, pasi u përdor nga forcat paramilitare serbe në luftërat e zhvilluara në Ballkan. Parashtruesi i ankesës si prova ka bashkangjitur *Fotografia e publikuar nga tubimi i mbajtur në Komunën e Skenderajt, dhe ftesën e njoftuar nga subjekti politik LVV, për tubimin në Komunën e Skenderajt.*

Në ankesën Anr.249/2025 pretendohet se me datë 28 janar 2025 kandidatja për deputete nga radhët e LVV, znj. Fitore Pacolli ka postuar në profilin e saj në facebook video incizim më

përmbytje të gjuhës urrejtëse ndaj subjektit politik PDK duke deklaruar se ...*Turma e madhe e qytetareve kishin dal në mbështetje të Kryeministrit Kurti, e ca huliganë të angazhuar nga PDK-ja, tentuan ti ndalojnë. Por ja që qytetarët e Skenderajt kanë vendosur ndryshe e do të vendosin ndryshe pra kësaj radhe ata do votojnë për Qeverinë më të mirë që ka pasur Kosova, pra qeverinë Kurti. Ata nuk janë peng i liderëve që kërcënojnë e i shantzhojnë për interesat e tyre politike.* Parashtruesi i ankesës si provë ka bashkangjitur CD me video incizimin e publikuar në profilin e rrjetit social Facebook, nga znj. Fitore Pacolli, të cilat përbajnë deklarata me përdorim të gjuhës nxitëse dhe urrejtëse ndaj subjektit politik PDK; <https://www.facebook.com/fitorepacollidalipi/videos/2350588898630621>, dhe screenshot i postimit të publikuar nga znj. Fitore Pacolli.

-Në ankesën Anr.250/2025, pretendohet se me datë 28 janar 2025 mbështetësi i subjektit politik LVV, aktualisht asistent personal i ministrit të Ministrisë së Mbrojtjes z. Afrim Berisha ka publikuar një status në profilin e tij në facebook në të cilin shkruan "*Mjerranët e bandave të PDK-së, njëzëri u përgjigjen: Familjes Jashari atyre po u shesim trimëri. Bandat e PDK-së, i kanë varfëruar qytetarët në Drenicë, prandaj i manipulojnë e po i përdorin për interesat e tyre. Pyetni bandat pasi jeni kaq të fortë se si është e mundur që midis Drenice të ketë komunë paralele serbe, si është e mundur që asnjë organizim asnjë protestë nuk u organizua për largimin e tyre, se për gjuajtje të kallashnikovit as që bëhet fjalë. Pyetni Bandat e PDK-së pse u dashtë të vijë Albin Kurti në pushtet për tua larguar Beogradin nda dera e shtëpisë. Pyesni bandat nëse mund të përgjigjen.....Nuk ka banda të kujtdo qofshin që mund të ndalin fitoren e Lëvizjes Vetëvendosje dhe Kryeministrit Albin Kurti*". Parashtruesi i ankesës ka bashkangjitur si provë : Statusi i publikuar në profilin e z. Afrim Berisha në rrjetin social Facebook; <https://www.facebook.com/Afrimberishaa/posts/pfbidOWakqa9ZV7qqroPhU6R4t8EdHfvMQKBgmpPhvzkrViaFCu2z85zUA9aqM9NqWXIvY1>, dhe screenshot nga statusi i publikuar në profilin e rrjetit social facebook të z. Afrim Berisha.

Në ankesën Anr.257/2025, pretendohet se më datë 27 janar 2025, kandidatja për deputete nga radhët e subjektit politik LVV, aktualisht ministre në Ministrinë e Drejtësisë znj. Albulena Haxhiu në tubimin e mbajtur në Komunën e Drenasit ka deklaruar: "*...ani pse Qeveritë e kaluara thirrreshin në emër të luftës, asnjëherë nuk bën asgjë për luftën, përveç që e votuan Gjykatën Speciale që dëmton interesat e Republikës së Kosovës sepse Kosova ska bëre krime lufte por Serbia. Tash po thonë që jemi mashtruar, por edhe nga Drenasi iu kërkohet atyre që qenkan mashtruar, të kërkojnë falje për këtë dëm dhe të heqin dorë nga politika, sepse qytetarët nuk i duan politikanët që mashtrohen, më Kryeministrin Kurti nuk do të ketë amnisti për kriminelët siç kishte amnisti në të kaluarën.* Parashtruesi i ankesës si provë ka bashkangjitur CD me përmbytje të video incizimit të fjalimit në tubimin e mbajtur nga Lëvizja Vetëvendosje në Komunën Drenas, në të cilën, znj. Albulena Haxhiu përdorë shprehje fyese, urrejtëse, denigruese, përçarëse dhe nxitëse ndaj subjekteve, dhe Ftesa publike e publikuar nga Lëvizja Vetëvendosje.

-Në ankesën 258/2025, parashtruesi i ankesës pretendon se me datë 27 janar 2025, kandidati për deputetë nga radhët e LVV, aktualisht ministër i Ministrisë së Bujqësisë z. Faton Peci në tubimin e mbajtur në Komunën e Drenasit, në fjalimin e mbajtur në këtë tubim ka deklaruar : *Me datën 9 shkurt Kosova ka dy opsione para vetës. Edi se presioni është i madh dhe*

mediatik edhe i atyre të cilët po fusin me investimet e fundit krejt parat e pista për të parandaluar dhe njëherë Albin Kurtin të fitoj i vetëm bashkë me Guxo dhe Alternativën mandatin e ardhshëm të Qeverisjes dhe rrjedhimisht janë duke realizuar një presion të paparë cep më cep të Kosovës por këtë presion cep më cep të Kosovës nuk e bëjnë që Kosovën ta kenë shtet me sovranitet cep më cep, por se ata kanë mbetur keq në xhepat e tyre atje ku kanë dashur me nda cop më cop. Rrjedhimisht unë mendoj që Drenica e heroizmit, sakrificës flijimit por edhe e krenarisë nuk do ti besoj atyre që e kanë konsideruar dhe e vlerësojnë veriun e Kosovës si dhuratë e Rankoviqit. Parashtruesi i ankesës si provë ka bashkangjitur Provë: CD me përmbajtje të video incizimit të fjalimit në tubimin e mbajtur nga Lëvizja Vetëvendosje në Komunën Drenas, në të cilën, z. Faton Peci përdorë shprehje fyese, urrejtëse, denigruese, përçarëse dhe nxitëse ndaj subjekteve kundërshtarë politike, dhe Ftesa Publike e publikuar nga Lëvizja Vetëvendosje.

-Në ankesën Anr.267/2025, pretendohet se me datë 28 janar 2025 në ora 00:57 Selvije Berisha mbështetësja e subjektit politik Vetëvendosje, anëtarë e LVV-së që nga 12 dhjetori 2024 ka shpërndarë një fotografi në grupin Vetëvendosje, në rrjetin social facebook me tekst shoqërues: "Kur po ju them që Sami Lushtaku është kriminel dhe mafioz ju po më shani në privat. Vota për Bedriun është shpëtim për Saminë. Parashtruesi i ankesës si provë ka bashkangjitur: Postimi i publikuar nga znj. Selvije Berisha, fotografia e shpërndarë në rrjetin social Facebook, në grupin Vetëvendosje!, ku dëshmohet edhe koha dhe data e publikimit të postimit; Të dhënat nga rrjeti social Facebook, ku dëshmohet se e njëjta është anëtare e Lëvizjes Vetëvendosje nga data 12 dhjetor 2024;

-Në ankesën Anr.268/2025 pretendohet se me datë 28 janar 2025 në ora 19:45 mbështetësja e subjektit politik LVV, aktualisht Koorditore e Komuniteteve në Lëvizjen Vetëvendosje znj. Dejona Mihali, ka publikuar një postim në rrjetin social facebook në të cilin shkruan : "a shkoj sot në Klinë të Epërme të Skenderajt, kandidati i PDK-së Bedri Hamza", Me Saminë bashkë a vetëm? Ende asnjë distancim nga huliganizmi drejtuar nga Sami Lushtaku, as shtabi i PDK-së as kandidati i PDK-së. Programi "treni elektrik" realiteti banditizmi". Parashtruesi i ankesës si provë ka bashkangjitur postimi i publikuar në profilin e znj. Dejona Mihali në rrjetin social në Facebook, <https://www.facebook.com/dejona.mihali/posts/pfbid02uaebz1uvK84g4VxW661uXsNdAYMoNpkxb7cie4vaKiHrRbAsrPsfKDvn4vWltWSD/>.

Në përgjigjen në ankesa të subjektit politik Lëvizja Vetëvendosje theksohet si në vijim:
Në përgjigjen për ankesën Anr.244/2025 të datës 30.01.2025, të subjektit politik Lëvizja Vetëvendosje LVV, vlerëson se ankesa është e pabazuar për faktin se e njëjta nuk përmban ndonjë fakt apo provë që ndërlidhet me shkeljen e pretenduar, si dhe e njëjta nuk është drejtuar subjektit konkret në këtë rast PDK-së, andaj PDK vetë aludon në vetveten kur përmendet korrupsioni. Pra z. Kurti në deklaratën e tij në asnjë çast nuk thekson subjektin e pretenduesit, në këtë rast PDK-së.

Në përgjigjen për ankesën Anr.245/2025 të subjektit politik Lëvizja Vetëvendosje LVV të njëjtën e ka vlerësuar si të pabazuar me pretendimin se nuk përmban ndonjë fakt i cili do ta ndërlikonte deklaratën/veprimin e përshkruar si shkelje dhe se deklarata e znj Haxhiu, në llogarinë e saj në facebook është vetëm përshkrim i një situatë e cila u pengua nga aktivistë të PDK-së, për mbajtjen e tubimit dhe lëvizjen e lirë të Kryeministrit më eskortën shoqëruese.

Në përgjigjen për ankesës Anr.246/2025, të subjektit politik LVV, e njëjta e ka refuzuar si të pabazuar për faktin se njëjta nuk përmban shkelje me pretendimin se Sami Lushtaku me mbështetës tjerë të PDK-së, kanë çrregulluar tubimin e LVV-së, në Skenderaj, kanë kërcënuar qytetarët brenda tubimit të LVV-së, dhe se lidhur me këtë ka fakte siç është fakti i arrestimit të personit Lavdim Jashari përkrasës i PDK-së. Pra deklarata e kandidatit Basha në llogarinë e tij në facebook, e ardhur pas veprimeve të lartcekura të mbështetësve të PDK-së, nuk është asgjë tjetër pos një përshkrim i një situatë të shoqëruar me veprimet penguese të këtyre anëtareve dhe aktivisteve të subjektit përkatës PDK për mbajtjen e tubimit.

Në përgjigjen për ankesën 248/2025 të LVV-së, pretendohet se shkrimi i bashkangjitur në fotografi nuk dëshmon asgjë as vendin as personin që do të ndërlikonte me subjektin LVV, madje për një vrojtues të rëndomte ndoshta mund të dakordohemi se vetëm një flamur vërehet mirëpo asgjë tjetër lidhur me gjendje faktike.

Në përgjigjen për ankesës Anr.249/2025, të subjektit politik LVV, theksohet se deklarata e kandidatës në llogarinë e saj në facebook është në përputhje me rregullativën zgjedhore, ishin aktivistët dhe mbështetësit e PDK-së, ata të cilët kanë çrregulluar tubimin e LVV-së, në Skenderaj duke kërcënuar qytetarë brenda tubimit të LVV si provë është edhe fakti i arrestimit të mbështetësve të PDK siç është Lavdim Jashari.

Në përgjigjen për ankesën Anr.250/2025, të subjektit politik LVV, theksohet se deklarata e kandidatit në llogarinë e tij në facebook është në përputhje me rregullativën dhe frymën e një fushatë zgjedhore. Mbështetësit dhe aktivistët e PDK-së, kanë çrregulluar tubimin e LVV, në dhe lidhur më këtë tashmë ka fakte siç është arrestimi i mbështetësve të PDK-së. Pra sipas parashtruesit të përgjigjes në ankesë deklarata e këshilltarit Berisha nuk është gjë tjetër veçse përshkrimi i një situatë.

Në përgjigjen për ankesën Anr.257/2025 të subjektit politik LVV theksohet se sa i përket deklaratës *“Përveç që e votuan Gjykatën Speciale që dëmton interesat e Republikës së Kosovës, sepse Kosova ska bëre krime lufte, por Serbia. Tash po thonë që jemi mashtruar por edhe nga Drenasi, u kërkojmë atyre që qenkan mashtruar, te kërkojnë falje për këtë dëm dhe të heqin dorë nga politika sepsë qytetarët nuk i duan politikanët që mashtrohen,* Ministra vetëm ka theksuar një fakt dhe një të vërtetë dhe një deklaratë të dhëne më parë nga vet Sekretarja e PDK-së znj. Vlora Çitaku, jo vetëm njëherë por shumë herë lidhur me themelimin e Gjykatës Speciale e cila kishte deklaruar se janë edhe ndjeshëm të mashtruar. Ndërsa sa i përket deklaramit *“me Kryeministrin Kurti nuk do të ketë amnisti për kriminelet, siç kishte amnisti në të kaluarën”* e njëjta vetëm se e rithekson një veprim dhe fakt të subjektit përkatës politik.

Në përgjigjen për ankesën Anr.258/2025 të subjektit politik LVV, ka theksuar se Ministri Peci ,në tubimin e mbajtur në Komunën e Drenasit ka përmendur fakte të cilat janë të ditura dhe të përmendur nga vetë subjekti përkatës PDK, këto deklarata të cilat tashmë janë deklarata notore nga vet akterë të rëndësishëm të këtij subjekti PDK-së Hashim Thaçi.

Në përgjigjen për ankesën Anr.267/2025, lidhur me pretendimet se personi i ashtuquajtur Selvije Berisha, është një mbështetëse dhe aktiviste e Lëvizjes VETEVENDOSJE! konfirmojmë si LVV, se personi i tillë nuk figuron si anëtarë apo aktivistë/ mbështetëse e LVV-së. Për më shumë, bazuar në provat e ofruara nga pretenduesi, në asnjë moment nuk

vërehet se Llogaria e tillë në facebook, të jetë si llogari reale e personit në fjalë dhe e cila do të ndërlidhej me shkeljen e supozuar të parashtruesve.

Në përgjigjen për ankesën Anr.268/2025 në pjesën e parë të këtij postimi znj. Dejana Mihali ka thënë: "A shkoi sot në Klinikë të epërme të Skenderaj, Kandidati i PDK-së Bedri Hamza? Me Saminë bashkë a vetëm", e ka ngritur pyetjen e cila në vetvete nuk përmban asnjë nga veprimet e ndaluara në bazën ligjore të cekur nga ankuesi, konkretisht neni 34 par 1 nën par 1.11 i LZP-së, që për bindjen e lirë dhe të garantuar me Kushtetutën e Republikës së Kosovës (Neni 40), e njëjta ka të drejtë të aludoj se z. Bedri Hamza nuk shkon në bastionet e PDK në Skenderaj pa Sami Lushtakun që i përket me prejardhje asaj ane të Kosovës.

Në pjesën e dytë znj. Dejana Mihali shprehet: "Ende asnjë distancim nga huliganizmi i drejtuar nga Sami Lushtaku as shtabi i PDK-së as Kandidati i PDK-së.", ku ka kërkuar distancim nga subjekti politik PDK për veprimet të cilat nga indiciet e forta lënë hapësirë për dyshim se kanë ndodhur pikërisht nga përkrahësit e PDK (fjala është për incidentin në Skenderaj për të cilin është në dijeni edhe PZAP për shkak të shumë ankesave nga subjektet lidhur me këtë ngjarje), pra znj. Mihali kërkon që ky subjekt të distancohet dhe të vetë deklarohet se nuk kanë të bëjnë me ngjarjen, konsiderojmë se edhe kjo pjesë e deklaratës së zonjes Mihali është legjitime dhe e drejtë e saj që të kërkoj nga një subjekt i certifikuar nga KQZ dhe që përfaqëson një pjesë të popullatës në Kuvendin e Kosovës, që të distancohet nga veprimet banditeske ashtu siç ajo i ka quajtur dhe ashtu siç ato veprime në të vërtetë edhe janë. Deklarata (postimi) objekt i kësaj ankese, nuk është i drejtuar nga PDK, por është i drejtuar nga huliganët e natës së 27 janarit ku edhe ndodhi incidenti në Skenderaj.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimit dhe Vendosijes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ankesat e evidentuara me numrat si ne vijim: Anr.244/2025, Anr.245/2025, Anr.246/2025, Anr.248, Anr.249, Anr.250, Anr.257/2025, Anr.258/2025, të datës 29.01.2025 dhe Anr.267/2025, Anr. 268/2025, të datës 30.01.2025, janë bashkuar dhe janë trajtuar me një vendim, andaj procedimi i këtyre ankesave evidentohen nën shenjën e përbashkët A.nr.244/2025, për shkak të natyrës së njëjtë të çështjeve të parashtruara nga subjekti i njëjtë politik PDK kundër subjektit të njëjtë politik LVV, si për nga përmbajtja ashtu edhe për nga kërkesat e paraqitura të ankesave.

PZAP-i, pasi që shqyrtoj dhe vlerësoi ankesat gjeti se:

Ankesat janë të bazuara

Paneli, pas shikimit të shkresave të lëndës të ofruara si provë materiale, ka gjetur se kandidatët dhe simpatizant të subjektit politik LVV, dhe atë: **Albin Kurti**, Kandidat për deputet dhe njëherit Kryeministër i Republikës së Kosovës në Drenas në tubimin e mbajtur ka deklaruar:

“jemi duke i hequr qafe, duke i pensionuar, duke i eliminuar nga skema e pushtetit politikanët, himni i të cilëve nuk është rreth flamurit të përbashkuar, e të dashur qytetarë të Drenasit ata i ka bashkuar korrupsioni”, kandidatja për deputete nga radhët e Lëvizjes Vetëvendosje, aktualisht Ministre në Ministrinë e Drejtësisë znj. **Albulena Haxhiu**, ka postuar në profilin e saj në rrjetin social në facebook, d eklarim me përmbajtje se gjuhës nxitëse dhe urrejtëse ndaj anëtareve të PDK-së duke deklaruar ...*Sami Lushtaku mbrëmë personalisht ka tentuar ta sulmojë eskortën e Kryeministrit. Ai me veturë zyrtare, 02Z të Komunës së Skenderajt e ka pre rrugën e Kryeministrit më qëllim sulmin. Dëgjova që disa gazetarë të Klan Kosovës, e kanë pyetur kryeministrin se po i përdor veturat zyrtare, ndoshta është më mirë me e pyet Saminë se prej së cilës pompë të benzinës i ke komandu Huliganët e tu para se të nisesh si i frustuar*”

kandidati për deputetë nga radhët e LVV z. **Dimal Basha** ka publikuar në status në rrjetin e tij social në facebook në të cilin shkruan “*Vota për PDK është vetëm fuqizim për Sami Lushtakun e që Kosovës nuk i duhen më politikanë që sillen si bandita. Kosova nuk i duron më Banditat: Në tubimin e mbajtur në Komunën e Skenderajt janë publikuar disa fotografi në rrjetet sociale dhe mediat elektronike të mbështetësve të LVV, të mbledhur në këtë tubim, duke ngritur tre gishta lartë, gjest i cili është simbol ekskluziv serb, i cili në tre vitet e fundit ka marr ngjyrimet nacionaliste, pasi u përdor nga forcat paramilitare serbe në luftërat e zhvilluara në ballkan; kandidatja për deputete nga radhët e LVV, znj. **Fitore Pacolli** ka postuar në profilin e saj në facebook videoincizim me përmbajtje të gjuhës urrejtse ndaj subjektit politik PDK duke deklaruar se ...”*Turma e madhe e qytetarve kishin dal ne përkrahje të Kryeministrit Kurti e ca huliganë të angazhuar nga PDK-ja tentuan ti ndalojnë. Por ja që qytetarët e Skenderajt kanë vendosur ndryshe e do të vendosin ndryshe pra kësaj radhe ata do votojnë për Qeverinë më të mirë Kurti. Ata nuk janë peng i liderëve që kërcënojnë e i shantzhojnë për interesat e tyre politike*”, Mbështetsi i subjektit politik LVV, aktualisht asistent personal i ministrit të Ministrisë së Mbrojtjes z. **Afrim Berisha** ka publikuar një status në profilin e tij në facebook në të cilin shkruan “*Mjeranët e bandave të PDK-së, njëzëri u përgjigjen: Familjes Jashari atyre po u shesim trimëri. Bandat e PDK-së i kanë varfëruar qytetarët në Drenicë, prandaj i manipulojnë e po i përdorin për interesat e tyre. Pyetni bandat pasi jeni kaq të fortë se si është e mundur që midis Drenice të ketë komunë paralele serbe, si është e mundur që asnjë organizim asnjë protestë nuk u organizua për largimin e tyre, se për gjuajtje të kallashnikovit as që bëhet fjalë. Pyetni Bandat e PDK-së pse u dasht të vijë Albin Kurti në pushtet për tua larguar Beogradin nda dera e shtëpisë. Pyesni bandant nëse mund të përgjigjen.....Nuk ka banda të kujtdo qofshin që mund të ndalin fitoren e Lëvizjes Vetëvendosje dhe Kryeministrit Albin Kurti*”, kandidatja për deputete nga radhët e subjektit politik LVV, aktualisht ministër në Ministrinë e Drejtësisë znj. **Albulena Haxhiu** në tubimin e mbajtur në Komunën e Drenasit ka deklaruar: “*...ani pse Qeveritë e kaluara thirreshin në emër të luftës, asnjëherë nuk bën asgjë për luftën, përveç që e votuan Gjykatën Speciale që dëmton interesat e Republikës së Kosovës sepse Kosova ska bëre krime lufte por Serbia. Tash po thonë që jemi mashtruar, por edhe nga Drenasi iu kërkohet atyre që qenkan mashtruar, të kërkohet falje për këtë dëm dhe të heqin dorë nga politika, sepse qytetarët nuk i duan politikanët që mashtrohen, më Kryeministrin Kurti nuk do të ketë amnisti për kriminelët siç kishte amnisti në të kaluarën*”, kandidati për deputetë nga radhët e LVV, aktualisht ministër i Ministrisë së Bujqësisë z. **Faton Peci** në tubimin e mbajtur në Komunën e Drenasit, në fjalimin e mbajtur në këtë tubim ka deklaruar : *Me datën 9 shkurt Kosova ka dy opsione para vetës. Edë se presioni është i madh dhe mediatik edhe i atyre të cilët po fusin me investimet e**

fundit krejt parat e pista për të parandaluar dhe njëherë Albin Kurtin të fitoj i vetëm bashkë me Guxo dhe Alternativën mandatin e ardhshëm të Qeverisjes dhe rrjedhimisht janë duke realizuar një presion të paparë cep më cep të Kosovës por këtë presion cep më cep të Kosovës nuk e bëjnë që Kosovën ta kenë shtet me sovranitet cep më cep, por se ata kanë mbetur keq në xhepat e tyre atje ku kanë dashur me nda cop më cop. Rrjedhimisht unë mendoj që Drenica e heroizmit, sakrificës, flijimit por edhe e krenarisë nuk do ti besoj atyre që e kanë konsideruar dhe e vlerësojnë veriun e Kosovës si dhuratë e Rankoviqit". Selviqe Berisha mbështetësja e subjektit politik Vetëvendosje, anëtare e LVV-së, që nga 12 dhjetori 2024 ka shpërndarë një fotografi në grupin Vetëvendosje, në rrejtin social facebook me tekst shqërues: "Kur po ju them që Sami Lushtaku është kriminel dhe mafioz ju po më shani në privat. Vota për Bedrin është shpëtim për Saminë", mbështetësja e subjektit politik LVV aktualisht Koordinatore e Komuniteteve në Lëvizjen Vetëvendosje znj. Dejana Mihali, ka publikuar një postim në rrejtin social facebook në të cilin shkruan: "a shkoj sot në Klinë të Epërme të Skenderajt, kandidati i PDK-së Bedri Hamza", Me Saminë bashkë a vetëm? Ende asnjë distancim nga huliganizmi drejtuar nga Sami Lushtaku, as shtabi i PDK-së as kandidati i PDK-së. Programi "treni elektrik" realiteti banditizmi".

Paneli vlerëson se gjuha e përdorur si më lartë nga kandidatët për deputet, mbështetësit dhe simpatizuesit e LVV se është gjuhë denigruese dhe urrejtëse në raport me subjektin politik PDK dhe se përdorimi i një gjuhe të tillë është në kundërshtim me nenit 34 pika 1.11), e LZP-së, me të cilën përcaktohet: "Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... 1.11) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë".

Sipas Panelit përmbajtja e deklarimeve të tilla të konsiderohen gjuhë nxitëse dhe urrejtëse kundrejt subjektit politik PDK, dhe se kjo konsiderohet shkelje e rregullave zgjedhore në Kosovë, nga se deklaratimet e tilla në kohë të fushatës zgjedhore, kanë për qëllim të krijojnë polarizim të elektoratit, të krijojnë atmosferë tensioni ose të nxisë ndjenja të urrejtjes dhe të përçarjes, të acaroj rivalitetin politik. Paneli vlerëson se partitë dhe kandidatët janë të detyruar të respektojnë etikën zgjedhore dhe të shmangin veprime apo deklarime që mund të sjellin pasiguri, destabilitet apo të përkeqësojnë atmosferën politike në përgjithësi, njëkohësisht janë të obliguar të respektojnë dinjitetin dhe integritetin e të tjerëve. Përdorimi i gjuhës së tillë mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Andaj Paneli gjeti se gjuha e përdorur është në kundërshtim me Kodin e Mirësjelljes për Subjektet Politike, Mbështetësit e tyre dhe Kandidatët gjegjësisht me dispozitat e nenit 34 LZP-së, ku janë të përcaktuara veprimet e ndaluara të subjekteve politike dhe me këto veprime janë shkelur dispozitat e nenit 34 paragrafi 1 nën paragrafi 1.11 të LZP-së.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimet e tilla përbëjnë përsëritje të shkeljeve për nga natyra, pjesëmarrjen e subjektit në fjalë në zgjedhjet e mëparshme që

konsiston në faktin se subjekti politik LVV, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Duke pas parasysh se Rregullorja 01/2024. dhe dispozitat e LZP, neni 120 paragrafi 1 nën paragraf 1.3 për shkelje të tilla parashohin dënimin me gjobe deri në 50.000 euro, Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politikë në fjalë ka bërë shkelje të natyrës së njëjtë në mënyrë të përsëritur.

Nga arsyet e theksuara me lart, e në kuptim të nenit 34 paragrafi 1 nën paragrafi 1.11), neni 118 paragraf 1 dhe neni 120 paragrafi 1 nën paragrafi 1.3 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

Anr.244/2025 më datën 01.02.2025



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.